

La purscheida da Surava vign undrada

La canorta Capriola a Surava è neida undrada gievgia passada cun igl premi da rancunaschientscha dalla Fundaziun Pestalozzi. La purscheida tg'exista siva da bung en onn survign 10 000 francs per sia lavour professiunala an favour da famiglias giovnas ainten la Val Alvra. Per la FMR ò la Capriola davert la porta ainten l'anterioura tgesa da scola e do invista ainten en project tgi less migliurar la cumpatibladad da famiglia e professiun.

SANDRA BALZER/FMR

«Gist perchegl tgi nous n'ischan betg perfetgs è igl plascheir tant pi grond», dei *Petra Simonet*, la manadra dalla canorta Capriola a Surava. Bung en onn siva l'avertura survign la canorta an Val Alvra en premi spezial: la Fundaziun Pestalozzi undrescha ella cun en premi da rancunaschientscha.

10 000 francs per la lavour cumpetenta

La Fundaziun Pestalozzi cun sedia a Turitg surdat igls sies premis per la promoziun tampreiva aint igls territoris da muntogna. Uscheia less ella promover projects tgi procuran per l'egualitad da schanzas e las perspectivas da furmaziun ainten las regiuns periferas. Ultra d'en premi principal – tgi vo chest onn aint igl Valais – èn nias surdos gievgia passada a Visp dus premis da rancunaschientscha, egn da chels – doto cun 10 000 francs – vo alla canorta Capriola a Surava. Petra Simonet, la manadra pedagogica, ò visiblamaintg plascheir da l'undraziun: «Igl è en bel sentimaint tgi nossa lavour vign rancunascheida – e chegl gist ainten ena regiun, noua tgi la tgira cumentara alla famiglia n'existiva dei betg. Chel premi mossa tgi la nossa lavour vign percepeida ed apprezzieida, er schi nous n'ischan betg perfetgs – nous fashagn simplamaint igl migler or dallas resursas tg'èn avant mang.»

Tenor la Fundaziun Pestalozzi ò la Capriola cun sia annuntzga persvadia cun sia lavour professiunala e la rolla impurtanta tg'ella gioia per la cumpatibladad da famiglia e professiun ainten la regiun muntagnarda. Anfignen avant en onn mantgeva chella purscheida cumplettamaintg ainten la Val Alvra. Genitours vevan da purtar lour unfants a Valbella, Savognin ni giu Tüsang. Inizia igl project per render pi attractiv la val per famiglias giovnas ò igl cumegn d'Albula/Alvra.

La dumonda crescha

Siva d'en onn fò Petra Simonet tg'è er manadra dalla canorta a Valbella bilantscha positiva. I sa mossa tgi ena tala purscheida vign duvrada urgentamaintg. Cun totalmaintg 22 unfants tgi vignan tgiros durant treis deis l'emda vign la canorta cun radond 12 unfants per de bagn acceptada. Igl intschess s'extenda sur las vischnancas Barvogn, Filisour, Alvagni e Surava. E la dumonda crescha, er schi la canorta vess cun 18 unfants per de anc capacitads. «Las famiglias tgi fon adiever dalla nossa purscheida èn fitg angraztgevas», dei la manadra, «bleras scumainzan cun en de per emda ed augmaintan chegl alloura.» La sfeida n'è betg angal stada da stabilisar la purscheida, mabagn er da surmuntar la sceptica. «Ainten regiuns muntagnardas dattigl savens l'idea tgi las mammas seian a tgesa e tgi na dovra betg ena tala purscheida. Ma la realitad è en'otra», dei Petra Simonet.



Creatividad è egn digls seis accents pedagogics, cun igls quals igl team dalla canorta Capriola promova igl svilup digls unfants.

Concept pedagogic unic

Igl local principal dalla Capriola tgi sa catta ainten l'anterioura tgesa da scola da Surava è igl salv da giuier: cò gioian, zambregian ed amprendan unfants tranter treis meis e la vigliadetna da scoligna. En local da durmeir separo porscha la pussebladad da sa retrer, dantant tgi en ulteriour salv vign duvro per magler giantar e marena e per activitads creativas.

La Capriola lavoura cun seis accents pedagogics tgi duessan promover igl svilup digls unfants: creatividad, musica, scienzas naturalas, muvimaint, promoziun linguistica e cumpetenzza sociala. Da chella purscheida è Petra Simonet spezialmaintg loscha. «Chegl ans fò er en po unics. Noss unfants dastgan decider sezs noua tg'els lessan sa participar. Nous promovign lour fermezzas.» Pinavant dettan rituals ena structura fixa agls unfants.

La collaboraziun stretga cun l'instituziun sociala Argo tgi sa catta er a Surava crescha sinergias supplementaras. Uscheia vignan igls giantars purtos dallas persungas cun impediments dall'instituziun vaschigna – ena collaboraziun tgi n'è betg angal practica, mabagn promova er scuntradas socialas.

Sumbreiva segl plaz

La canorta d'unfants Capriola è egna da treis canortas dall'Uniu Kibe Laibella an Surmeir. Scu bleras otras instituziuns ainten la promoziun tampreiva èn er chellas treis canortas confruntadas cun sfeidas. La mancanza da persunal qualifitgia sa fò valeir, er schi Petra Simonet accentuescha tg'els vegian furtegna cun lour team. «Nous luvragn ainten l'Uniu Kibe

Laibella cun collaboratours tg'èn schon tar nous siva da blers onns e tgi abiteschan ainten la regiun. Chegl apprezziajn nous zont fitg. Ed uscheia pudagn nous barattar resursas tras nossas instituziuns a Surava, Valbella ed a Savognin. Pero, las paias ainten la nossa bransch èn anc adegna bassas, e chegl angravescha da ti-gneir forzas spezialisadas giovnas siva lour amprendissadi», daclera Petra Simonet.

Ed er igls meds finanzials èn limitos. Ena gronda part digls daners digl premi duess eir an projects tgi vignan duvros urgentamaintg, scu per exaimpel procurar per sumbreiva segl plaz davant la canorta a Surava u l'installaziun d'en local creativ. «Cun chellas investiziuns pudagn nous migliurar venavant nossa purscheida ed integrar anc migler igls basigns digls unfants», daclera Petra Simonet.

Planiso tgira er per scolaras e scolars

Igl premi na porta betg angal meds finanzials, mabagn mutivescha el er da sa sviluppar anavant. Planiso è per la stad 2025 ena tgira cumentara alla scola tgi risguarda er igls basigns d'unfants da scola durant las vacanzas e sch'els on liber igl sivamezde. Ena purscheida tgi saress uscheia ena largia ainten la regiun. «Nous nign a sclareir igl basign ed eventualmaintg a scumanzar cun dus sivamezdeis», dei Petra Simonet.

«Tgi nous vagn cò a Surava ena canorta è en grond gudogn per las famiglias e facilitescha lour mintgade e dat agls unfants la pussebladad da sa sviluppar ainten ena cuminanza sociala», resumescha Petra Simonet.



Petra Simonet è la manadra pedagogica dalla canorta Capriola a Surava. FOTOS SANDRA BALZER



Igl salv principala dalla canorta Capriola a Surava. Cò gioian unfants tranter treis meis e la vigliadetna da scoligna.